

東
華
續
錄

東華續錄

咸豐八十七

臣王先謙敬編

臣陶潛宣恭校

六月己亥朔諭軍機大臣等本日國瑞到京卽經召見詢以軍營一切光景並閱僧格林沁恆福奏數月相持情形並遵保出力人員一摺所奏甚合機宜朕心深慰普魯斯及各國公使乘坐大火輪船俱停大沽口外僧格林沁等已飭天津道照會曉諭卽交所獲米夷帶歸投遞並移咨西凌阿如夷船駛入北塘不妨聽其停泊一經上岸卽帶馬隊堵截該大臣所籌與前降諭旨用意正相符合著相機妥辦以期及早戡事僧格林沁督辦海防籌畫精詳不辭勞瘁著先行賞給御用烟壺一對時辰表一對卽由國瑞齎交僧格林沁祇領所有保舉加銜升用賞戴翎枝及先換頂帶各

員均依議行至應賞勇號並拉木棍布扎布加恩之處統俟定局
後再降諭旨其未經宣布情節俟國瑞到津後再爲傳諭可也將
此由五百里諭知僧格林沁恆福並傳諭文煜知之○諭前因勝
保進攻天長兵單未能卽克當諭和春仍遵前旨迅撥江北精兵
前往天長會同勝保將該城剋期收復茲據和春奏稱探得天長
逆黨分股回犯六合以後北路較鬆並未於張玉良等各軍內酌
量調撥前往勝保軍營會剿見在天長賊勢雖分勝保扼守盱眙
尙未能攻克天長著該大臣仍遵前旨酌撥江北精兵前往相機
會剿速拔堅城杜賊北竄以固清淮門戶勝保亦得分兵進剿懷
遠等處賊匪不至爲此股逆黨牽掣該大臣勿得輕聽將士之言
稍分畛域至將來克復天長以後此項官兵應仍調回江北毋庸
出勝保軍營調遣將此由六百里諭令知之○西甯辦事大臣福

濟奏籌辦投誠野番大概情形得旨此時止好羈縻將來蒙番能相安惟在隨時妥辦若仍藉端滋事更可驅逐有辭著曉諭蒙古不可自弛武備賴他人之勢以自立若蒙古能強堪以敵番任其自行驅逐亦無不可○以浙江餘姚官紳剿匪出力予員外郎謝敬等升敘○以擅離江南紅山寨營盤革副將魁霖職○庚子諭軍機大臣等官文奏軍情緊要請添撥西丹馬隊赴楚助剿等語據稱皖省賊蹤徧野非分三四路進兵則孤軍深入堪虞前請撥黑龍江西丹止有千名尙恐不敷分派自應添益馬隊以圖進取惟見在天津尙未撤防馬隊未能調撥著官文就見有兵力先爲布置儘巴揚阿所帶黑龍江西丹一千名到楚即可令其赴皖剿辦俟天津撤防再行飭撥馬隊前往以資攻剿將此由五百里諭令知之○辛丑諭軍機大臣等勝保等奏粵逆由六合分股竄撲

時貽危急江南援兵尙未派往一摺前因天長未復賊燄甚熾疊經諭令和春等就近於張玉良熊天喜等所統各軍內派撥數千名前往會同勝保攻剿見在大股逆匪由馬家集等處竄撲天長各軍之後勝保兵力過單難於抵禦所有張玉良等兵勇見俱駐紮揚州六合等處著勝保飛咨和春催提所派鎮將酌帶兵三四千人馳赴天長會同勝保兵勇將該城速籌克復儻盱眙需兵卽提此項官兵自北向南堵剿更爲得勢惟江南北軍務均歸和春督辦地方甚廣需兵較多前因和春未卽撥兵赴援天長業經諭令俟克復天長後仍將所撥之兵回至江南北軍營歸和春調度勝保不得截留致滋貽誤至定遠南路喫緊勝保已派馬隊援應仍著翁同書督飭弁兵實力堵扼毋得疏懈其黑龍江馬隊並著該大臣等催提以資助剿將此由六百里諭令知之○子江西殉

難知縣方楸等陣亡訓導洪象賢祭葬世職○壬寅特普欽等奏
俄酋木里斐岳幅五月初一日經過黑龍江時稱欲赴烏蘇里綏
芬等候會勘地界初四日過黑河口則稱欲往上海初七日過烏
蘇里口則稱欲赴奇咭不日旋回撤卜勒幅等前來三姓未卽折
回初九等日復有大小船八十隻舢舨十七面夷官及男婦人等
數百名攜帶烏槍等多件由黑龍江下駛蓄意蔓延請飭景淳前
往辦理奏入 上命景淳星馳前進熟籌辦理○癸卯調任廣西
巡撫勞崇光奏廣西通省軍務見在籌辦情形得旨卿竭力支持
於茲數載朕深嘉許今調任粵東地方夷務處處皆關緊要接署
督篆後妥爲經理以副委任○予廣西陣亡署知州任秉鈺等祭
葬世職○甲辰諭內閣張亮基等奏兵練圍攻昆陽海口屢獲勝
仗首逆伏誅一摺雲南逆回馬凌漢糾眾滋事本年二月間該逆

聚眾數千夜襲昆陽州城署知州吳襄隆被執不屈罵賊遇害該逆占踞州城經外委張起龍等督率兵練奮勇攻剿四月初二日該逆率眾劫營我兵設伏以待槍礮齊施當將首逆馬凌漢轟斃並擊斃匪眾各百餘人奪獲器械無數張起龍親督兵練直抵城下被城上礮傷登時殞命見在兵勇圍攻州城該匪堅守不出又海口地方匪徒麇集我兵屢次進攻疊獲勝仗前後斃匪數百人賊勢已極窮蹙著卽乘此聲威飭令該將弁等迅克昆陽州城並將海口匪黨全行掃除毋畱餘孽○諭軍機大臣等前據勝保奏逆匪由六合分股竄撲盱眙危急疊經諭令和春迅撥張玉良熊天喜等兵馳往會同攻剿本日據勝保馳奏正在南路鏖戰賊分另股由盱眙山後繞至湖邊致被闖入該縣等語蔣壩爲東北緊要門戶該大臣擬嚴扼此處以固清淮並分飭濱臨洪湖各州縣

收絕船隻以防偷渡所辦似尙足恃日內江南援兵計可前來著
迅速相機堵剿克復盱眙天長力扼北竄李世忠張元祿等業已
抒誠效順其部下可用之兵諒必不少何不責令殺賊立功乃各
袖手旁觀置身事外耶另片請派帶領步隊得力鎮將馳往軍營
等語勝保前請調之樂善見因辦天津防堵已補授直隸提督未
能令其遠赴皖省已飭令和春選派提鎮大員矣將此由六百里
諭令知之○諭本日據勝保奏天長賊勢猖獗竄撲盱眙兵力不
支致被攻陷勝保已退紮蔣壩力扼北犯清江之路見在天長未
復盱眙又失勝保一軍竭力支持深恐賊眾兵單設有疏虞於大
局頗有妨礙此皆江南軍情未免隔絕和春受裨將慫慂之言坐
視不救將來驅賊北竄該大臣與勝保厥咎維均著和春仍遵前
旨卽在張玉良等各軍內迅撥精銳數千名並選派帶步隊之提

鎮大員管帶星速馳赴北路會同勝保合力進剿克復盱眙天長
二縣以固清淮門戶不得稍有遲延致滋貽誤將此由六百里諭
令知之○直隸總督恆福奏請截畱南漕一萬石接濟兵食從之
○僧格林沁奏夷船陸續退出見籌防守機宜得旨所慮實爲周
妥統俟本日該督與米酋見面後方能得其梗概再爲詳諭飭遵
○予山東陣亡州同翟錫周等雲南被戕知縣吳襄隆祭葬世職
○丙午諭內閣玉明等奏久旱得雨商民呈請演劇酬神一摺奉
天爲陪都重地道光年間曾奉 諭旨不容戲班聚集致趨侈靡
茲據該將軍等奏商民等以酬神祝嘏呈請演戲自應俯順輿情
嗣後該省地方遇有祈雨謝秋祝嘏等事准該商民等演戲三五
日仍報明地方官俾示限制此外省城以內大小文武官員以及
商民人等仍恪遵前奉 諭旨概不准尋常演戲以敦樸素而杜

奢華○恆福奏接米國照會訂於初九日備船往接到北塘後卽行進京換約並有攜帶些少隨員之語奏入 上命准其來京○

丁未諭內閣勝保奏官軍進攻盱眙克復縣治大獲勝仗一摺五月二十八九等日勝保派營總烏勒興阿等設伏高橋左側將賊陣衝爲數段逆眾踉蹌敗回濱湖水師亦開礮轟擊殲匪無算該大臣復激勵將士挑選網船配以槍礮由老子山一路泝流上駛進攻湖面以扼盱眙之背一面派記名副都統富勒德恩布等分路進剿均定於初二日夜間齊偪盱眙陸兵銜枚疾走直抵東關馬隊先登步隊繼後該匪倉皇潰竄我軍槍箭齊施斃匪不計其數水師亦鼓勇登岸槍礮轟擊所有縣中踞賊悉數竄出登山我軍奮勇兜剿立將盱眙縣治克復其濶溪一帶經麟瑞等接仗亦獲全捷該大臣於數日之內督兵克復盱眙尙爲妥速所有在事

出力文武員弁兵勇准其擇尤酌保以昭激勸○戊申諭內閣見在俄羅斯國遣使來京著派戶部尚書管理理藩院事務肅順刑部尚書瑞常定期與該使臣相見○庚戌諭軍機大臣等本日據翁同書奏捻匪攻撲定遠縣城調兵擊退解圍一摺此次懷遠捻匪萬餘突撲定遠其勢甚熾因各路援軍大至賊從西南一帶逃竄城圍始解該撫見已馳往該縣紮定兵勇查探賊蹤扼截並飭殷家澗鑰橋等處各軍加意嚴防所籌尙爲周妥惟所稱壽春鎮潁郡二處皆係居中扼要擬暫行扼紮該處以聯傳振邦軍營自係因與勝保軍營隔絕起見見在盱眙縣治已經克復該撫諒可與勝保聲息相通如果賊勢緊急並可飛咨勝保撥兵應援仍著翁同書督飭惠成富明阿等馬步隊竭力堵禦以固大局斷不可退往壽潁以致捻氛又熾將此由六百里諭令知之○吏部以大

學士賈禎授何殿閣請得旨著爲體仁閣大學士○恆福等奏米

酋華若翰於初九日在北塘會晤辭意恭順已許其來京換約報

聞○以蔣徵蒲爲四川按察使

由成綿龍茂道遷

○壬子和春奏官兵進

攻江浦獲勝並留兵揚州以防北竄得旨續有嚴諭催調援軍自

必遵辦雖盱眙見在收復北路仍係緊要斷不准稍分界限又奏

盱眙被陷嚴防天長賊匪旁竄批自行籌防則惟恐不及與人分

兵則千百必較成見難化獨軍營尤甚○以察杭阿爲理藩院右

侍郎

由內閣學士遷

○癸丑諭軍機大臣等僧格林沁奏英佛船隻全數

開行並護送米夷進京辦理情形一摺英佛兩國夷船自初十日

陸續開行至十二日全數駛去或由上海或赴廣東添募兵船希

圖報復均未可知著僧格林沁仍督飭將弁加意防守設法哨探

毋稍大意至米酋到京由北塘登岸旱路不妨許其坐轎至繞過

天津卽由水路行走通後令其坐車或坐羸輜進京著恆福文煜先與說明米夷寄俄書信著恆福卽封咨軍機處交理藩院轉付較之令其自行投遞更覺妥協將此由六百里諭知僧格林沁恆福並傳諭文煜知之○于安徽陣亡縣丞王炳修等祭葬世職○甲寅命浙江在籍鹽運使金安清幫籌本省軍餉仍兼辦皖南捐餉事宜○乙卯諭軍機大臣等前因勝保兵力過單疊次諭令和春撥兵會剿昨復批諭和春不准稍分界限諒和春必遵照辦理本日勝保憑陳和春等按兵不動置若罔聞各情詳覽所奏竟似以皖賊猖獗全行諉過於和春亦屬非是勝保督辦皖省軍務責有攸歸如果進規廬州踞匪則浦口等處亦必畏首畏尾何至重勞兵力江南之兵或可多分兼顧皖北此次和春不肯迅撥援兵業已疊降諭旨責其心存畛域而勝保好爲大言是已非人亦

失和衷之道本日據翁同書奏南北賊蹤環伺定遠餉道不通情形萬分危急勝保見派穆騰阿等帶兵分路進擣而賊勢全窺定遠必須該大臣親往督勦方能得力見在江南派來會勦之軍想已早到著勝保將蔣壩一帶妥爲布置卽馳赴定遠與翁同書協力勦辦俾可迅殄賊氛不至孤軍失陷又據翁同書奏賊攻來安甚緊而清流關等處亦有賊蹤著勝保迅速應援以杜北竄其攻撲來安賊匪李世忠近在滁州亦應責令助勦豈可有投誠之名而無立功之實至翁同書片奏請調兵撥餉等語陝甘官兵見已無可調撥本日諭令傅振邦督兵馳赴定遠會勦合之勝保翁同書之兵已屬不少其餉銀一節昨已諭瑛榮撥銀五六萬兩由穎壽一帶解往定遠見在盱眙已復餉道已通勝保亦當分撥餉銀接濟定遠目前可不至缺乏將此由六百里各諭令知之○諭翁

同書奏饑軍坐困孤城危急請飭傅振邦督兵援剿等語自逆賊竄向天長盱眙勝保悉銳東行以保清淮門戶不及兼顧淮南定遠孤城賴翁同書悉力支拄而南有粵逆北有巨捻賊眾兵單及汴澗挫失定遠被圍幸將賊匪擊退而食盡援絕困守圍中捻首龔得復往廬州句合粵匪逼近縣城屢圖攻撲實屬萬分危迫陳玉城大股復由盱眙圍攻來安前隊已偏滁城清流關珠龍橋等處皆有賊蹤將與捻逆爲一若無援軍趕到勢恐不支本日因盱眙已克勝保尙在蔣壩諭令該大臣迅卽回軍救援尙恐爲天長等賊所牽掣未能全數拔營傅振邦本係督剿三省捻匪當此定遠危急之時著卽帶兵馳往應援或因蒙城賊圩尙未肅清亦著分兵會剿先其所急見在關保已抵豫防分堵蒙鹿等處山東復有黃良楷等助剿之師皆可調令協力堵剿計日勝保亦當由蔣

壩折回與翁同書聯絡一氣又得傅振邦一軍爲之策應必可救
護定遠攻打懷遠以遏賊氛其來安清流關等處已諭勝保撥兵
援守至翁同書軍餉匱絕傅振邦如能酌帶餉需以濟饑軍更爲
妥善將此由六百里諭令知之○予安徽陣亡知縣許垣等祭葬
世職建祠○丙辰恆福文煜奏派員護送米國使臣啟程 上以
桂良等到京命仍經手互換和約○恆福等奏俄人借坐米國船
隻駛進北礮臺停泊所遞照會以見派伊國副章京步多國似克
通事官石射馬略甫二員帶同跟隨二人欲由旱路進京投給伊
國公使書信並稱慕喇約甫帶戰船到海口聽候回音見在擬給
照覆奏入 上命恆福等准俄人由北塘進京諭僧格林沁嚴加
防範○丁巳諭軍機大臣等特普欽等奏俄夷由水陸分赴琿春
並強赴興開湖查看地界及在烏蘇里江建房墾地情形各一摺

俄酋伊格那提業幅到京以後聲稱欲會議東西交界本月十六日復有俄人至天津北塘投遞照會稱有緊要書信須送給伊格那提業幅曰係爲議勘地界起見並聞木里斐岳幅亦卽到津將來以理開導如該酋曉悟其應如何辦理之法仍須該將軍等定議京中不能遙制至烏蘇里江等處地方並無與俄人交界之處已疊經諭令該將軍等設法攔阻該夷人船下駛必須先過黑龍江地面奕山於木酋前來爭論時既未能據理拒絕而於人船下駛時亦未聞攔阻實屬咎無可辭特普欽等雖疊次奏報派員攔阻亦復毫無實際豈得以奏明在前遂可塞責耶景瀄此時定已行抵吉林著會同奕山等將人船下駛應如何妥爲開導拒阻其業經建房墾地之人如何驅逐籌畫辦法奏明爲要將此由五百里各諭令知之○己未何桂清奏洋船陸續回滬探聞見赴印度

調兵並邀各洋商議事奏入 上命何桂清相度機宜嚴密防範

○庚申諭軍機大臣等前因定遠軍情危急諭令勝保將蔣壩一帶妥爲布置卽馳赴定遠與翁同書協力勦辦並諭傅振邦帶兵馳往應援或派兵會剿以期聯絡策應捍衛孤城本日復據翁同書奏捻匪龔得句合廬賊回撲定遠縣城諸軍迎戰失利該撫見扼西路鎗橋集團援剿而孤城坐困糧食已盡危急情形陷在旦夕疊次咨請勝保赴援杳無回信各等語勝保經朕特簡督辦皖省軍務乃既未能進攻廬郡又未能克復天長徒以防賊北竄爲詞僻處蔣壩坐令定遠危急饑軍難振於全省軍務大局辦理實無把握疊次諭令和春撥兵赴天長盱眙等處會同勝保攻勦諒已派員帶兵前來著勝保俟此項援軍一到卽將攻取天長保護蔣壩事宜交替迅速啟程馳赴定遠會同翁同書救護危城並攻

打竄匪以顧大局傳振邦接奉前旨諒已帶兵啟程赴援定遠卽
著會同勝保翁同書聯絡一氣協力堵剿該城餉道斷絕勝保曾
不力籌接濟是誠何心前經諭令河南巡撫就近協濟銀五六萬
兩未知能否解到著勝保傳振邦疏通餉道並各帶餉需以濟餓
軍毋令譁潰翁同書另片奏請飭鄭魁士赴皖幫辦軍務該提督
甫經交卸甯防本日據奏傷病較前加劇精神委頓是以未令赴
援此時傳振邦諒已先到勝保亦卽回軍當可毋庸另派將此由
六百里各諭令知之○諭本日據翁同書奏懷遠捻匪勾結廬城
粵逆圍撲定遠該撫扼守鑰橋激勵將士援應賊眾兵單餉道斷
絕勢將悉行淪陷等語該處情形萬分危急業已諭令勝保速行
帶兵赴援惟蔣壩一路亦關緊要並諭令俟江北官兵到後再行
啟程和春派往之兵係何員管帶著飭令星馳前進將蔣壩防務

接替以便勝保前赴定遠毋得再有遲誤其進攻天長防堵蔣壩事宜卽責成和春派往之員一手辦理毋得貽誤勝保招降擒眾不下數萬人近聞惟李世忠輩得有官職之人業經薙髮其所部降眾仍蓄髮爲匪肆行劫掠勝保未能鉗束患生肘腋大爲可慮勝保督辦安徽全省軍務旣未能進攻廬郡漸圖克復各城卽天長一邑亦日久未復並聞盱眙係賊匪自行退出徒以嚴防北竄爲名僻處蔣壩並不能兼顧定遠以致餉道不通翁同書饑軍坐困辦理殊無把握若令日久因循恐誤大局金陵與皖省密邇勝保軍營情事和春必有所聞著詳加查訪據實具奏將此由六百里諭令知之○諭何桂清等奏籌解京餉銀兩並將協濟皖省月餉暫行停解等語安徽軍營缺餉已久本日據翁同書奏捻匪勾結廬賊圍撲定遠兵勇竭力守禦皆敝草根瓜實饑困情形殆難

言狀亟應籌款接濟何桂清兼轄皖省尤應先其所急所有每月協濟安徽餉銀二萬兩仍著源源撥解毋稍遲誤將此由五百里諭令知之○命已革順天府尹宗元醇督辦河南歸陳兩府團防事宜○辛酉諭軍機大臣等陳孚恩奏急籌軍餉請飭黃贊湯辦理鹽務一摺據稱連年用兵耗費捐輸抽釐而外別無良策惟有清理鹽務取之不窮尙可接濟於萬一黃贊湯於數年前曾辦鹽務頗資軍餉請飭該河督通盤籌畫等語見在東河尙無緊要工程黃贊湯向曾辦理鹽務其中利弊自必深知惟該河督所熟悉者係何省鹽務抑或各省情形俱能洞悉此事原須分別省分會同地方官辦理非可徒託空言至其疏銷之法通變之方因時地而制其宜順人情而盡其力如果參稽有素不難詳細指陳著黃贊湯據實具奏以備採擇將此諭令知之○壬戌諭內閣前因庚

長奏運河來源告竭請飭山東迅卽開壩當諭令崇恩就近斟酌辦理茲據該撫奏微山湖存水微弱較定誌尙短五尺六寸且江境河源告竭係十字河淤塞及長河未挑之故若湖口開壩一洩無餘於蘇省無濟而東省必致舟楫不通殊多妨礙等語自係實在情形所有湖口大壩仍著暫緩開放俟湖口收符定誌再行啟壩宣濟○諭軍機大臣等據僧格林沁奏辦撫夷大局當剛柔相濟令郭嵩燾齋摺呈遞朕詳加披閱並召見郭嵩燾詢悉該大臣籌畫勦撫事宜均屬允當至勦撫兼施兩事本並行不悖該大臣於議勦既有把握則撫局自可不至遷就本日據何桂清奏英佛兩酋已先後回至上海見令華商夷商設法解散一切情形已咨行僧格林沁查照辦理該大臣接到後諒已深悉刻已諭令何桂清確探動作如華商肯爲剖辨是非該夷自知理屈自可乘機利

導諒何桂清必能斟酌辦理何桂清錄呈新聞紙著鈔給閱看將此由五百里諭知僧格林沁恆福並傳諭文煜知之○癸亥諭軍機大臣等前經兩次諭令勝保傳振邦帶兵親赴定遠力解重圍迄今未據覆奏翁同書駐師鑪橋竭力督勦勢已萬分危險本日據奏十二日督率麟瑞等軍幸將城西賊營四座踏毀城上亦繼勇下城擊退逆賊惟賊數太眾既毀之營復爲所踞並建木城數座截斷紅心驛道兼阻該撫赴援之軍兵團民勇既無營壘帳房復無勺漿粒米連日沿村勸借僅得米數十石悉送前敵並接勝保函會如定遠有失屬該撫退至明光津泥一帶覽奏實深焦灼賊匪陳玉城擁眾數萬橫踞關山藕塘等處廬賊捻匪南北奔突與義賊相應翁同書等皆在圍中鑪橋之西卽壽州境內向無驛站且潁毫各路盡係捻巢翁同書卽欲退扼萬難衝過且斷無輕

棄定遠一城坐視淮南數百里淪陷之理惟有撫循饑軍竭力待援勝保既克盱眙株守蔣壩已昧機宜且知定遠勢將失陷復不星馳赴援轉令翁同書退出欲與蔣壩聯絡竟視定遠爲可棄是何居心儻城陷師潰豈能當此重咎著仍遵前旨馳赴定遠以保危城昨閱傅振邦奏報拔營西發尙未知定遠危急情形並著卽遵前旨趕緊督兵赴援仍各帶餉需前往接濟若再遲延不進翁同書等致有蹉失惟勝保等是問將此由六百里各諭令知之○甲子諭軍機大臣等前因定遠軍情緊急疊次諭令勝保前往救援本日據該大臣奏本擬親督援剿因逆匪大股竄踞竹鎮窺伺東北見仍扼駐蔣壩並添兵馳赴明光策應西路等語勝保畱防西路各軍雖有一萬餘名而賊蹤一至紛紛潰散可見所畱之兵並非精銳見在定遠一城危在旦夕該大臣已由湖路西行駛至

津泥地方旋因探聞逆股回竄竹鎮圖撲東北復又折回蔣壩所
畱張得勝等馬步官兵僅一千百餘名又止進紮明光並不令其
竟赴定遠亦屬無益勝保既不能進克天長又不能拒陳玉城東
竄之賊雖非有心避賊惟避處一隅以致全省軍務鞭長莫及措
置殊失機宜見在定遠行將淪陷竟爾坐視不救設有疏虞咎將
誰諉和春所派總兵安勇一軍兵數若干勝保並未奏明此軍一
到勝保即可將蔣壩防剿事宜交卸啟程惟安勇所帶兵必須四
五千人始敷堵剿如不及四千之數著勝保酌量畱兵交付督帶
並多畱馬隊以利馳逐不得全行帶回致東北一路空虛勝保接
奉此旨著卽星馳赴援定遠毋得日事遷延致干罪戾將此由六
百里諭令知之○乙丑諭軍機大臣等前因定遠危急疊經諭令
勝保傳振邦星速赴援本日據翁同書奏定遠失陷已明降諭旨

將勝保翁同書交部嚴加議處並將帶兵各員分別懲處矣定遠被圍日久近城援軍爲數不少卒因餉糈不繼以致失陷該大臣等辦理不善實堪痛恨翁同書駐紮蘄橋雖經勝保屬令前赴明光津泥而該撫以淮南地關緊要未肯輕棄如果餉需有著仍以不退爲要日來傳振邦當已赴援惟賊勢蔓延應如何與翁同書各軍聯絡協力攻剿著該提督悉心籌辦毋稍遷延勝保督辦全省軍務此時淮南糜爛而株守一隅大勢全失罪無可逭和春所派安勇一軍當已可到著遵前旨卽以蔣壩防守事宜交該總兵督辦僅兵力不敷並著勝保抽撥湊數以資防剿勝保卽剋日啟程相機進剿務與翁同書傳振邦協力同心迅圖克復稍贖前愆至翁同書另片奏各省協撥餉銀請飭分別解交勝保及該撫軍營自爲兩營相去遙遠起見勝保此時諒必與翁同書力圖會合

分解一節自可暫無庸議前撥河南餉銀五六萬兩本日復諭令瑛榮速行解往其餘山東等省協餉卽著該撫等派員迎提均勻支放以作士氣將此由六百里各諭令知之○諭前因翁同書奏天長盱眙相繼失守餉道斷絕當經諭令瑛榮迅籌銀五六萬兩派員由潁壽一帶解往定遠以濟急需茲據翁同書奏懷遠捻匪句結廬城賊匪疊次攻撲定遠官軍奮力堵禦因餉竭兵單以致縣城被陷該撫駐兵蘆橋兵勇枵腹荷戈各路餉道梗阻請速撥餉銀解營等語皖北餉道久已斷絕定遠復被賊陷軍情萬分緊急豫省壤地毘連若趕緊撥銀解往可期迅速直達著瑛榮仍遵前旨迅撥銀五六萬兩派員由潁壽一帶解往蘆橋翁同書軍營毋稍延緩將此由五百里諭令知之○以定遠被賊竄陷欽差大臣勝保巡撫翁同書下部嚴議總兵官惠成吉順副都統麟瑞等

革職畱營效力○丙寅諭內閣和春奏請派提督畱防高淳東壩等語浙江提督鄭魁士著駐紮高淳東壩一帶辦理防剿事宜○諭和春奏江北逆援渡江水師截擊獲勝一摺江北逆賊屢圖援救金陵總兵吳全美派參將郭定猷帶領師船於陳家洲江面堵擊賊眾密運大礮布置江岸由裕溪口突出礮划來撲被擊敗退酋府洲等處陸賊悉出礮聲四起東梁山裕溪口蕪湖各出賊划數十隻圍繞攻撲郭定猷率同守備何慶龍等奮勇截剿適下游儘先守備歐陽忠師船前來援應兩面夾攻賊遂披靡四散其往下關竄渡之賊亦經都司李潤雄督兵擊退該水師官兵與賊接仗至三晝夜之久擊沈賊划殲斃賊眾不計其數防剿尙爲出力仍著和春飭令實力堵擊無任竄渡○諭軍機大臣等本日據和春奏因太平一路有添賊內犯之謠仍在六合調兵勇二千名派

總兵安勇統帶馳赴蔣壩歸勝保調遣等語見在定遠業經失陷勝保急應由蔣壩馳援而天長一日不克清淮一日不安安勇所帶兵勇不過二千加以勝保所畱兵丁僅足以防蔣壩未能進克天長揚州距天長不過百餘里著和春卽將派防揚州之兵選派得力大員管帶移營進逼天長迅速克復以期肅清江北門戶和春統轄南北諸軍其蔣壩天長一切防勦機宜勝保啟程後卽責和春調度勿令賊匪有隙可乘將此由六百里諭知和春並傳諭張國樑許乃釗知之○江西巡撫耆齡奏克復景德鎮得旨侯查明詳細情形速行具奏○予江西陣亡參將李逢春等祭葬世職○丁卯諭軍機大臣等前因定遠危急疊經諭令勝保傳振邦帶兵赴援並諭勝保俟和春所派之安勇一軍到後酌量添足兵力令其防守蔣壩然後馳赴定遠昨據翁同書奏定遠失守復諭該

大臣等迅速赴援茲據勝保奏擬卽親往前敵由明光等處設法
布置仍卽折回蔣壩並請飭傅振邦扼要屯紮各摺片定遠旣經
失陷則賊已闌入腹地該處兵已撤退淮南一帶地方必致盡遭
蹂躪於全局殊有關繫著勝保仍遵前旨俟安勇一軍到後酌量
布置令守蔣壩卽親帶馬步馳赴定遠會同翁同書傅振邦迅圖
攻克縣城毋任久踞傅振邦疊奉寄諭諒已啟程馳赴該處若如
勝保所請令其扼紮固鎮九灣一帶則僅能防守要隘而不足以
資攻剿著傅振邦仍遵前旨迅速馳援或孫疇王圩一帶未能藏
事卽飭令苗沛霖等練勇奮力攻剿以資接替該提督卽可抽軍
前往定遠先其所急此次定遠城陷皆由各營將弁先行潰退著
勝保於到後查明將首先潰退之員請旨正法以肅軍律將此由
六百里各諭令知之○諭有人奏廣西藩司蔣益澧近來志意驕

盈因扣畱軍中口糧以致兵勇解體騷擾鄉民去冬賀縣之敗實由於此該藩司自敗後退距省垣委任畏葸貪鄙之候補知府潘家馥帶勇暫駐賀縣數月之久未聞進仗任聽湘勇擄掠村莊本年三月間湘勇潰散該府踉蹌奔走拋棄軍裝以致賊匪蹂躪各村又柳州潯州各處賊匪被鄉團防堵嚴密賊黨覓食維艱勢漸窮蹙蔣益澧遷延不進迨柳州復爲賊踞始行出省致誤事機等語廣西被兵日久民生凋敝全賴地方大吏保衛閭閻若如所奏蔣益澧以帶兵大員輒敢不發軍糧致令兵勇擾累軍民亟應確切根究以嚴法紀著曹澍鍾按照所參各節並知府潘家馥縱勇擄掠村莊等情詳細查明據實參辦毋稍徇隱至蔣益澧因軍營出力疊次加恩擢至藩司應如何奮勉圖報儻敢恃恩驕縱必當予以嚴懲見在柳潯股匪尙未盡殲著該撫卽飭該員帶兵進剿

如或任意玩延不能撫馭兵丁以致搶掠害民著卽嚴參治罪原
片著鈔給閱看將此由五百里諭令知之○戊辰諭軍機大臣等
前因定遠危急疊經諭令傅振邦帶兵赴援茲據該提督奏稱捻
逆分股竄擾北路喫緊未能遠道南援各等語捻首分踞各圩該
提督一軍分路防剿兵力本屬不敷勢難兼顧自係實在情形見
在捻首余麻和等竄擾蕭縣之王家樓分踞各村該處東接徐郡
西連碭虞最關緊要卽著派馬步各隊繞出賊前截其北竄該提
督既未能赴援定遠卽著親督各軍向百善站一帶直搗賊巢一
面飛咨德楞額郝上庠等督兵接應勿令闖入山東境內將此由
六百里諭令知之○是月展緩湖北廣濟縣被水地畝上年銀米
秋七月己卯朔賞已革正白旗蒙古都統德興阿六品頂帶交欽
差大臣僧格林沁軍營差委○庚午曾國藩奏臣於五月十二日

派知府曾國荃帶領兵勇五千餘人前往景德鎮會同張運蘭等移營雞腳嶺一帶層層進逼二十六日營壘未成賊出三股過河來撲各營梟水鈔擊殺賊百餘人時浮梁援賊大至計二萬餘人各營分三路截擊陣斬黃衣騎賊及先鋒賊十餘名賊始奔潰二十八日賊復過河直撲老湘營我軍迎擊殺賊百餘名六月初二日賊仍傾巢來撲以馬隊三四百人排列對河而以一股犯老湘營一股犯岳字營張運蘭帶隊將賊擊退直衝過河與岳字營進逼里村逆巢賊從旁路包鈔我軍陣亡五十三人都司李印典守備向其昌陳玉才死之經朱品隆等各營接應賊始大敗自是三戰皆勝圍逼愈緊賊糧垂盡知其不能久踞矣適天雨江漲劉子潯水師與彭玉麟派來之水師遊擊任星元等緊逼西瓜洲晝夜環攻楚軍陸師亦將賊卡焚燒斷賊接濟十三日夜賊出火礮四

十餘架夾岸輔以陸賊焚攻水師我軍排礮對擊楚軍亦出隊進
勦兩岸之賊擊斃多名十四日夜水師各營施放噴筒火箭延燒
鎮市民房該逆乘黑暗潛竄浮梁曾國荃與張運蘭等督兵分路
進攻一面焚燒各卡斬馘追奔十五日抵浮梁縣該城有一河之
隔賊搭浮橋上下三道礮船十餘號其殿後之賊尙有數千未過
浮橋我軍窮追賊扼橋抗拒傷我弁勇十餘人千總高成春死之
相持良久城內忽出悍賊三四千人衝過浮橋曾國荃張運蘭等
分營官兵奮擊立斃悍賊二百餘名該逆自相踐踏落水死者近
千人當卽跟蹤入城張運蘭從西門外鈔入王文瑞從東門外鈔
入所有斷後悍賊殄殲殆盡當將縣城克復敗賊奔竄祁門建德
一帶我軍追過縣城四十餘里戍刻收隊是日追逐七十餘里斃
賊二千餘名生擒二百七名查景德鎮爲江西皖浙三省要衝去

臘派張運蘭帶領楚軍會剿前後數十戰互有勝負今幸派兵助
勦力戰成功江西全省肅清除曾國荃係臣親弟不敢仰邀議敘
及江軍出力人員應由撫臣奏獎外其尤爲出力之按察使銜卽
選道張運蘭等先行開列懇恩給予獎勵其餘楚軍出力員弁可
否由臣擇尤保獎陣亡之都司李印典守備向其昌陳玉才守備
銜千總高成春請各照本職從優議卹又奏臣奉防蜀諭旨業將
景德鎮喫緊難遽撤退據實覆奏今幸景德鎮克復情形又自不
同竊思防蜀之行原係防湖南之賊也儻能於湖南協力痛殲豈
不事半功倍見在大股賊圍寶慶湖北已派李續宜帶兵赴援臣
擬檄調張運蘭等一軍四千人先行馳赴寶慶併力會剿在楚多
殺一賊卽入蜀少去一賊乘景德鎮得勝之勢用弁勇追救桑梓
之情或可得力臣部署定後卽由湖口武昌而上或先扼駐宜昌

等郡使湘賊不敢渡江窺伺制宜以保湖北之西路如賊果入川再行酌調蕭啟江張運蘭兩軍督同赴蜀防剿上諭內閣官軍

攻克景德鎮及浮梁縣城江西全省一律肅清剿辦甚爲得手曾國藩調度有方著交部從優議敘在事出力之知府曾國荃著免選知府以道員用卽選道張運蘭著賞加布政使銜王文瑞著賞給揚勇巴圖魯名號遊擊任星元著賞給勵勇巴圖魯名號已革編修吳嘉賓著以內閣中書不論雙單月遇缺卽選並賞加五品銜其餘楚軍出力各員并著曾國藩擇尤請獎其江西各軍出力人員著書齡查明請獎陣亡之都司李印典守備向其昌陳玉才千總高成春著各照本職從優議卹○諭軍機大臣等曾國藩奏攻克景德鎮賊巢並浮梁縣城一摺已降旨先行給獎矣該侍郎檄調張運蘭等一軍四千人先赴寶慶會剿如能在湖南境內將

該逆協力痛殲使不至西竄自與該侍郎入川無異所恐賊勢散漫路徑分歧未能攔截曾國藩雖先駐宜昌等處仍當偵探賊情如寶慶一帶未能遏其入川之路卽當親驅兵勇赴蜀以便調度堵剿機宜未可遷延貽誤著曾國藩仍遵前旨俟到楚後與官文等妥商進紮地方並酌撥兵勇以備帶往設或賊犯四川則蕭啟江張運蘭兩軍皆可調赴防剿該侍郎隨時酌辦可也將此由六百里諭令知之○辛未諭內閣王懿德慶端奏請將閩省殉節及勞績身故官紳士庶人等分別旌卹一摺福建省防剿逆匪該文武官弁及紳士幕友眷屬人等或臨陣捐軀或守義殉難或積勞身故情形均堪憫惻自應分別旌卹勵節褒忠著照所請所有開單陣亡之同知銜補用知縣朱汝霖等各文武員弁紳士婦女均著照例分別議卹旌表以慰忠魂其業經議卹之署尤溪縣知縣

金琳護水師提標遊擊銅山營守備鄭振纓被害尤慘著入祀昭忠祠並於殉難地方各建專祠用彰忠節○諭軍機大臣等勝保奏督兵馳赴明光馬步軍進剿紅山三河各集連獲勝仗一摺並另片奏擬卽移師淮北與傅振邦會合急攻懷遠等語明光等處既經張得勝等連挫兇鋒賊勢既已稍卻和春所派總兵安勇帶馬步隊見已到蔣壩勝保卽可遵照前旨將蔣壩防守事宜交該總兵督辦所籌湖面舟師豫爲多備以防賊船夾淮下駛著卽趕緊購備船礮以資攻剿至所稱見在圖攻定遠孤軍深入未必確有把握自不若先行攻復懷遠再渡淮而北較易爲力著勝保酌撥兵勇三四千會合安勇之軍分紮盱眙蔣壩後卽相度情形聯絡淮北各軍急攻懷遠前因捻匪分投竄擾北路喫緊據傅振邦奏未能赴援定遠已諭令卽督各軍回百善站一帶直擣賊巢俟

勝保移師淮北該提督所統各軍如可合而爲一卽將懷遠縣城迅圖克復毋稍延緩至翁同書見已退撤壽州一帶就糧該撫所統兵勇數尙不少仍著懷遵前旨迅卽回攻定遠毋再遷延惟馬隊較少著勝保酌撥應用該撫不得以防堵壽潁爲詞置重兵於無用之地將此由六百里各諭令知之○以捐輸軍餉永廣福建鄉試中額十名安徽二名徽州府歙縣休甯黟縣學額各十名婺源績溪太平各五名祁門三名青陽二名石埭一名○贈福建殉難道員袁績懋等祭葬世職○壬申諭軍機大臣等官文奏請飭吉林將軍於琿春等處挑選西丹三百名赴楚助剿等語見在吉林地方俄夷赴琿春三姓等處希圖占地經該將軍設法攔阻因該省馬隊調出者多見須多備餘丁實無可調撥如將未經操練之丁勉強撥往恐徒勞跋涉到楚後仍不適用官文前曾請撥黑

龍江西丹千名赴楚著該大臣於八九月間催提前往以資應用並咨行沿途將軍督撫妥爲應付以利進行將此諭令知之○諭張芾奏浮梁景德鎮敗匪悉竄祁門邊境請飭援師合剿一摺曾國藩因江西肅清先調張運蘭一軍赴援湖南該侍郎亦卽日拔營由武昌府前往宜昌等處乃浮梁景德鎮敗匪竟傾巢奔竄突至祁門邊界延及箬坑禾沙坑口一帶建德之軍旣隔於外祁門之兵復絀於內徽州勢處甚迫亟應由江西就近撥兵援應曾國藩能否暫畱兵勇前赴徽州越境會剿或以兵力已單須親自帶往湖北則江西一省必尙有可用之兵著耆齡卽行抽撥勁旅赴祁門一帶協剿著該侍郎與該撫會同商辦以免蔓延將此由六百里各諭令知之○癸酉諭內閣兵部題請派本年武會試提調官一本所有開列滿漢司員四人著照文會試之例由該堂官帶

領引見候旨揀派並著該部纂入則例永遠遵行○甲戌諭軍機大臣等前因袁甲三奏請飭山東在登萊青三府屬海口舉辦抽釐又前任直隸總督慶祺奏請於烟臺海口徵稅協濟天津海防經費均經先後諭令崇恩飭屬查明妥議辦理本日據該撫奏登萊青三府所屬洋面遼闊口岸散漫行戶零星貲本無幾若於照例三分抽稅外再加抽釐深恐商力不支烟臺海口亦屬僻徑船隻收口時往往將貨物分船載至天津無憑徵稅各等語各該地方抽釐收稅既據該撫奏稱窒礙難行何以昨據何桂清奏烟臺地方有夷商船隻停泊貿易並於該處買地造屋有粵人范姓經理其事如果烟臺地方偏僻該酋等不當覬覦盤踞視爲利藪可見該撫所稱無憑設局徵稅但據該地方官一面之詞畏難卸責尙非實在情形況登萊青三府地方遼闊海口不少豈可概聽屬

員蒙蔽毫無辦法著崇恩另委妥員詳加察訪將何口尙堪試辦之處妥議具奏總期有裨軍餉亦不至擾累商民是爲至要將此由四百里諭令知之○乙亥諭軍機大臣等傳振邦奏擒匪分路北竄官軍截剿獲勝並會剿幅匪各摺片所籌疏通餉道及布置北路各節均尙周妥勝保前擬移師淮北進攻懷遠欲與傅振邦所統各軍合而爲一該提督見當北路喫緊之際恐未能前往會合卽可督飭參將滕家勝等與勝保一軍聯絡聲勢相機剿辦至永城濉口一帶爲北竄要路尤須加意嚴防見在賊勢紛竄靡定著該提督察看何路緊要卽往何處遏剿總以層層進逼自北而南勿令乘隙北犯方爲妥善協領常陞等剿辦蘭郟等處幅匪甚爲得力著卽畱於該處地方會合德楞額乘勝搜剿盡掃餘氛勿稍鬆勁其翟三禿子一犯飭令嚴拏務獲毋任漏網將此由六百

里諭令知之○諭何桂清奏遵旨籌度發給英佛照會一摺並將往來照會鈔錄呈覽均已閱悉佛酋於接到照會後以尙須聽候該國王回信爲辭英國則尙無回覆該酋等無故挑釁致受懲創此時須候伊國王信息亦係意中之事何桂清旣已發給照會並經夷商開導俟其轉圜再行斟酌辦理至上年天津所定條約內載有立約之後以四箇月爲期彼此曉布商民知悉之語今米夷雖卽日換約尙須四箇月後方照新章辦理爲期尙寬英佛屆時當可得該國回信不至兩難見在旣賴夷商從中開導所有上海通商各國想必照常辦理並著該大臣於報便奏聞將此由六百里諭令知之○以捐輸軍餉永廣湖北鄉試中額一名江蘇四名沐陽奉賢學額各一名四川興文一名○丙子諭軍機大臣等前因駱秉章奏請飭四川陝西江西各省撥銀濟餉當經降旨諭令

王慶雲曾望顏各於司庫籌撥銀十萬兩者齡於折漕項下撥銀二十萬兩迅卽解赴湖南以資接濟茲據駱秉章奏江西解到二萬兩四川報解銀五萬兩陝西報解銀三萬兩均尙委解在途卽使到楚僅供旬日之用請飭將欠解銀兩迅速撥解等語見在賊匪竄踞寶慶水陸防剿兵勇增至六萬餘名需餉甚鉅著有鳳曾望顏者齡仍遵前旨迅將欠解銀兩照數撥解湖南毋稍延緩將此由五百里各諭令知之○湖南巡撫駱秉章奏酌提各屬常平倉穀以濟軍餉得旨所奏太屬含混既有倉穀卽可運營抵餉設有梗阻由各處變價解營亦甚便捷豈有紛紛解省之理恐營中身歷鋒鏑者未必實惠均沾而省局在事員吏藉滋分享無定價之折銀各屬府縣並可因此彌補缺虧更難稽覈○丁丑諭軍機大臣等翁同書奏軍情緊急請飭催解月餉軍火等語自定遠失

陷皖北軍情危急該撫移紮壽州爲圖攻懷遠分防霍大之計所
 有山東山西陝西等省每月應解銀二萬兩河南每月應解銀三
 萬兩著崇恩英桂瑛榮各撥火藥一萬斤鉛丸一萬斤擡槍一百
 桿鳥槍二百桿探明道路解赴翁同書軍營以資接濟再該撫所
 領各軍需餉甚繁並著有鳳每月籌撥銀一萬五千兩取道湖北
 迅解壽州軍營該督撫等務當移緩就急毋得區分畛域藉詞延
 宕將此由五百里各諭令知之○諭翁同書奏移紮壽州布置情
 形並調兵籌餉各摺片粵捻各匪欲繞越鑪橋斷大軍後路翁同
 書以壽州險要移軍該處以疏通潁郡餉路所稱跨越長淮進攻
 懷遠有高屋建瓴之勢與勝保所奏移師淮北急攻懷遠之議亦
 相符合該撫見派遊擊黃開榜等沿淮而下自可與勝保之軍會
 合夾擊卽由紅心池河等處進規定遠六安毘連楚豫地方緊要

卽飭副將蔣又能認真防守無許該匪闖入至陝西官兵已據曾
望顏奏請免調甘肅兵出調亦多上次寄諭已詳悉言之鄭魁士
畱防高清東壩未便調赴皖省且據奏見亦患病德興阿在江北
一蹶不振難勝重任鞠殿華業已身故均無庸議該撫此時惟就
見有兵力將壽州一帶妥爲布置一俟勝保移師淮北與該撫會
合則軍威自能復振昨據傅振邦奏陝西等省解皖餉銀由徐到
營該提督派博崇武選帶馬隊分兵分攜百兩取道苗練各寨徑
送翁同書大營變通辦理可期妥速此項銀兩卽著翁同書設法
迎提以資接濟將此由五百里諭令知之○永定河溢○允畢承
昭回籍養親以周起濱爲廣東布政使齡椿爲廣東按察使
由鹽運使
遷○子安徽殉難知縣周佩濂祭葬世職建祠○戊寅諭軍機大
臣等將埔爲清淮門戶與皖省東北境地相連勝保因北路懷遠

爲張翼三逆老巢日肆猖獗定遠復遭失陷督軍回剿不能仍紮
蔣壩該處僅有和春派往安勇一軍及勝保所畱都司陳德雄一
軍尙恐兵力未厚難資堵禦袁甲三久歷戎行所有蔣壩防堵事
宜卽著就近督率籌辦應否擇要進紮何處並著酌度辦理其清
淮一帶水陸分歧雖盱眙已克而天長尙爲賊踞如袁甲三進紮
前路卽著庚長妥籌後路防護機宜勿令賊氛旁竄爲要將此由
六百里諭令知之○諭勝保奏明光擊賊獲勝並添募各勇通籌
剿辦情形一摺明光一帶旣經官軍連獲勝仗亟應乘此聲威分
路進剿所籌防守蔣壩等處勝保前奏酌撥兵勇三四千會合安
勇之軍分紮盱眙蔣壩此次奏報又云撥畱陳德雄一軍合以漕
河派防兵勇並安勇之兵足敷四千名之數是該大臣所撥兵勇
並無三四千之多究竟撥畱若干仍著奏明所稱或攻懷遠隨時

相機酌辦朕亦不爲遙制惟定遠爲粵捻甫營新窟賊勢甚熾且
明光一帶業經連挫兇鋒似當就近攻剿卽西進定遠會同翁同
書所派之兵迅圖克復仍著該大臣酌度緩急妥籌進剿以殄賊
氛至勝保所撥翁同書馬隊並著仍畱應用毋得全數調回將此
由六百里諭令知之○勝保奏陳巡撫翁同書潰軍情形得旨該
撫撫字有餘折禦本非良材彼之所短正藉汝之所長以濟之至
定邑之失該撫之撤隊西奔百喙奚辭但汝係統帥自知炫己之
長不顧援彼之失亦屬非是朕統籌各省軍務如家主總握其綱
亦須各執其事各盡其長豈有不論事之成敗日聚訟於庭庸何
益乎○己卯諭內閣上年英吉利國船隻駛至天津海口首先開
礮傷我將弁是以命科爾沁親王僧格林沁在大沽海口嚴行設
防此次各該國前來換約業經桂良花沙納在上海告以大沽設

防須由北塘海口行走乃本年五月英國普魯斯到津不遵桂良等原約竟欲闖入大沽口內毀我防具五月二十四日駛進雞心灘用炸礮轟斷鐵練我兵仍未與較二十五日火輪船十餘隻拉倒鐵戙十餘架皆豎紅旗志在決戰經直隸總督恆福等派員持天津道照會前往英國並不接收竟敢先行開礮轟擊礮臺我軍始開礮回擊沈毀該國戰船多隻擊斃上岸步隊數百名英兵挫敗實由自取並非中國失信其時米利堅國使臣華若翰仍依桂良等原約駛至北塘海口求准進京呈遞國書經恆福等具奏該國照會情詞恭順是以朕准令進京呈遞國書本日據桂良花納納將米國使臣華若翰照會該大臣等公文呈閱見其詞意甚屬恭敬出於至誠所有該國使臣齋來國書准其進呈卽派桂良等接收至換約一節本應回至上海互換朕念其航海遠來特准將

和約用寶發交恆福卽在北塘海口與該國使臣互換自換約之後永遠和好通商以示朕懷柔遠人敦崇信義至意此旨卽著桂良花沙納宣示米利堅使臣華若翰知之○諭軍機大臣等見在米夷在京頗爲恭順卽日呈遞國書所有該國和約已加恩准其
在北塘海口互換俟該夷啟程卽將和約由驛發交恆福該督接
到後卽在北塘海口互換可也至前獲夷人蔣什坡一名旣係米
國之人卽可發還該國以示懷柔所獲英夷一名曾受重傷畱之
無益或卽交米夷令其由海船帶回上海交何桂清由上海道交
還英酋普魯斯收明著該大臣斟酌辦理可也將此諭知僧格林
沁恆福並傳諭文煜知之○庚辰諭軍機大臣等前因浮梁景德
鎮敗匪竄入祁門邊境曾諭知曾國藩耆齡會商撥兵援應茲據
張芾奏祁門竄匪業經擊退惟石埭建德兩路喫緊請飭景德鎮

帶兵大員移兵合剿等語見在祁門之匪經副將余永椿等並該處兵團疊次擊敗後復竄入石埭之七都勢甚猖獗各營被圍數重先後被陷貴池青陽之賊乘機蠢動建德城賊又傾巢撲營情形極爲緊迫亟應由江西就近撥兵援剿曾國藩如可酌撥兵勇暫畱江西著卽飭令移紮建德會同該處官兵合力剿賊其普承堯一軍兩月來株守彭澤並未出境援應著耆齡飭令該總兵迅卽帶兵前往夾擊見在江西賊匪業已肅清不得以防守彭澤爲詞致令鄰境賊蹤蔓延將此由六百里各諭令知之○諭朕聞勝保招降擒匪如李世忠輩得有官職之人業經薙髮其所部降眾仍蓄髮爲匪肆行劫掠張元澄雖降仍踞守臨鳳四出打糧虐取於民漫無鈐束此輩狼子野心受撫後若誠心效順自當責令立功使爲我用儻或仍懷反側卽須加以懲創不可遷就姑容驚虛

名而忘實禍一旦變生肘腋將何以禦之至盱眙本無城郭前據勝保奏係用兵克復而翁同書則稱該處賊匪係自行退出本日又據和春奏盱眙居民聞天長旣陷卽將糧米搬運上船賊至無可擄掠是以退去勝保探聞賊退卽以克復入奏未免語涉鋪張所有勝保前奏克復盱眙請保出力人員之處著不准行勝保身任大員督兵在外竟敢虛詞粉飾爲將士邀恩本有應得之咎念其從前臨陣尙屬勇往此次姑免深究嗣後如再捏報勝仗經朕察出必當治其冒功之罪懷之將此由五百里諭令知之○和春奏臣與張國樑許乃釗籌商見在情形惟有先盡力於金陵一城絕其根株則枝葉自萎獨是欲破金陵必須先斷浦口欲斷浦口必須添募精銳一萬人由張國樑統帶不分晝夜一面力攻一面進紮營壘斷賊糧路兼卻外援庶幾攻拔較易惟是用兵之權操

之軍營而籌餉之事則在督臣必餉項有出然後可以集事查鎮江至常州路僅兩站一水可通臣於履勘鎮城後卽馳赴常州與督臣何桂清面商意見相同藩司王有齡聞臣赴常州由蘇趕到隨同熟商於無可設法之中竭力籌畫按月撥出銀十萬兩以期料量一切臣等當相度事機剋期蕝功見在江浦圩埂半被水淹須俟白露秋分節後路皆涸出其時應募之人應製之物亦可辦成臣卽當督飭各軍力圖掃蕩得旨將來有此大舉固爲平定一大轉機但不可收復一金陵空城俾粵匪另營巢窟蔓延之患有甚於今日者懷之○壬午予浙江陣亡按經歷楊翊等祭葬世職○癸未諭內閣戶部奏糧臺收支款項請申明舊章按限奏報以杜冒濫一摺各路軍營糧臺收支款項前經戶部奏定章程令將每月管收除在四柱總數並官兵領項軍需用項按照部頒款式

據實填報每屆半年具奏一次自降旨准行以後各糧臺多未遵辦惟江南江北糧臺及清江籌防局將支收總數按限開單具奏亦未將官兵領項及軍用細款開報其爲濫支濫應恐干指駁並豫爲將來含混開銷地步均屬顯而易見當此經費支絀籌畫維艱自非申明舊章不足以示整飭各路統兵大臣及直省督撫身膺重寄具有天良著各振刷精神將各糧臺濫支濫應等弊悉心查訪實力釐剔其收放總數飭令管理各員遵照前頒款式造報自本年六月起以六月十二月爲限每屆半年奏報一次其從前未經奏報者並限於本年十二月以前一律趕辦毋許再有延宕至軍需指報各項除地丁外以捐項釐金爲鉅款往往有未經報撥已充別款並業已提用並未報撥者殊不足以昭覈實嗣後此兩項銀錢除歸入四柱清冊外仍著各糧臺另造捐輸釐金收支

總冊每屆半年隨同前項四柱清冊具奏一次自此次嚴諭之後各辦理糧臺人員儻敢仍前玩泄卽著各該統兵大臣及各督撫嚴行參辦儻該大臣督撫等不能破除情面扶同徇隱並著戶部據實糾參定當從重懲處以爲玩視軍需者戒將此通諭知之○諭前因駱秉章奏查明已革湖南永州鎮總兵樊燮被參各款均有確據並有侵餉重情當降旨將該革員拏問交駱秉章提訊茲據官文奏稱該革員以問官飭換親供挾嫌串害並知府濫邀優保各情遣家人赴該督衙門呈訴請派大員查辦等語案關鎮將大員侵虧營餉並各員挾嫌陷害濫邀保舉情節較重是否該革員藉詞狡展抑或事出有因亟應徹底根究著派官文親提全案人證卷宗俟錢寶青出關後會同秉公嚴審確情定擬具奏尋奏樊燮於被參後呈訴各款訊無確據至米折一項係官項錢糧旣

經李貴芳稟知請領該革鎮延不發還卽係私自借用擬請從重發往軍臺效力贖罪下部議從之○諭軍機大臣等寄諭湖南巡撫駱秉章前據官文奏湖南賊勢蔓延恐其入蜀諭令曾國藩親提所部赴蜀並諭有鳳先於夔州正路及酉秀一帶趕緊布置扼要防守本日據有鳳奏湖南之辰州常德水陸各路均可竄入川省酉秀黔彭尤爲緊要涪州爲各路總口見在阜陞等駐紮防剿楚南之劉長佑江忠義田興恕皆爲賊所畏憚請飭俟賊匪西竄蜀疆卽分道追擊等語賊匪見在麤聚寶慶曾國藩先後派往之蕭啟江張運蘭等軍陸續可到卽可與劉長佑等會同夾擊但恐該匪乘隙旁竄如果勢將入蜀卽著該撫於劉長佑等各員內酌量選派一二員帶兵嚴行堵截毋令竄入川疆方爲上策設或該逆竄入有鳳所派阜陞等亦卽出境迎頭堵剿不難聚而殲旃其

楚南各軍如追勦入川卽由川省應付餉需免由湖南遠道運送將此由五百里諭令知之○命四川在籍提督孔廣順往涪州會辦防勦事宜○甲申諭內閣何桂清徐有壬奏酌議借闈鄉試事宜開單呈覽一摺本年己未恩科江南文闈鄉試借用浙闈舉行其內外簾一切事宜自應參酌舊章變通辦理除監臨事務前已降旨令江蘇學政孫葆元入闈代辦外其外簾提調著照何桂清等所擬派令江蘇署臬司蔡映斗屆期隨帶委員赴浙設局辦理仍由浙江撫臣加派見任大員及印委各員幫辦內簾提調及監試等官著由江蘇省酌派道府大員前往內外簾官一併由江蘇調派其巡查彈壓校檢各武職卽由浙江巡撫就近派充至該省鄉試係帶行乙卯正科所有官卷民卷中額均著加倍取中其捐輸推廣之額均歸民卷取中不得加入官卷與考生監著學政於

錄遺時通飭各府州廳縣學確實加結詳送以杜弊竇至所稱同考官擬改爲十房之處前因張芾奏安徽紳士籲請舉行鄉試業經降旨准其於十月內同江蘇一併借用浙閩辦理試卷旣多恐十房不敷分校著該督等酌量添派○諭軍機大臣等御史趙元模奏請將黃河淤地酌辦屯田一招據稱清江浦以東三里許舊係河身今黃河北徙淤出平地縱約百餘里廣約十里按里三頃七十五畝計之可得地三四千頃可屯三四千家得兵三四千人或分授兵丁或招集良民應由漕河兩督就近體察情形悉心籌畫等語見當軍餉支絀之時自應變通盡利以濟兵精況屯田卽古寓兵於農之意果能辦理得宜實爲足食足兵之善策著袁甲三庚長體察情形有無窒礙覈議具奏原摺著鈔給閱看將此諭令知之○乙酉 上御勤政殿召見惠親王怡親王載垣鄭親王

端華兵部尙書陳孚恩軍機大臣穆蔭匡源文祥諭曰上年順天鄉試科場舞弊經欽派王大臣審明定擬於本年二月間降旨將柏葭等分別懲辦並宣示在廷諸臣俾咸知朕意本日據載垣等奏科場案內審明已革大員並已革職員等定擬罪名一摺科場爲掄才大典考試官及應試舉子有交通屬託賄買關節等弊問實斬決定例綦嚴不得以曾否取中分別已成未成此案已革工部候補郎中程炳采於伊父程庭桂入闈後竟敢公然接收關節條子交家人胡升轉遞場內卽係交通屬託關節情罪重大豈能以已中未中強爲區別程炳采著照該王大臣等所擬卽行處斬已革二品頂帶左副都御史程庭桂身任考官於伊子轉遞關節並不舉發是其有心蒙蔽已可概見雖所收條子未經中式而交通已成確有實據卽立予斬決亦屬罪有應得惟念伊子程炳采

己身罹大辟情殊可憫若將伊再置重典父子概予駢首朕心實
有不忍程庭柱著加恩發往軍臺效力贖罪此係朕法外施仁並
非從死罪遞減亦非因其接收關節未經中卷姑從末減也其致
送關節之謝森堦等本應照科專條治以死罪惟與業經正法之
羅鴻繹等尙屬有間工部候補郎中謝森堦恩貢生報捐國子監
學正學錄王景麟均著革職熊元培著革去附貢生與已革候補
郎中李旦華已革候選通判潘敦儼已革翰林院庶吉士潘祖同
已革刑部候補員外郎陳景彥已於二月加恩免其死罪著照所
擬均發往新疆效力贖罪李旦華之父前任刑部侍郎李鳳清見
在原籍病故著該部查明李旦華如家有次丁卽於百日後起解
如家無次丁著俟安葬伊父後再行發遣降調湖南布政使潘鐸
平日訓子無方著交部議處其應議之監臨監試專司稽查及內

外簾執事各員並按檢王大臣著禮部按照科場條例據實查明各該員所司何事應議之處詳晰開列銜名具奏再降諭旨另片奏未能究出冒名之人請旨議處等語載垣端華全慶陳孚恩著交宗人府吏部照例議處至科場律例本有專條刑部所擬程庭桂等罪名俱不在科場例內輒將向辦各案以已成未成比擬實屬不合著傳旨申飭科場一案前後所降諭旨著卽補入禮刑二部則例永遠遵行不必俟修纂時續入將此通諭知之○給事中李鶴年奏風聞程庭桂父子均擬大辟可否交廷臣會議得旨刑賞非臣下所應操遇一事紛紛聚訟尙復成何事體况程庭桂等一案朕意度外間議論尙不以程炳采爲重輕實欲減輕死罪則免死之謝森墀等自酌量遞減豈有不逢迎見任大員子弟而庇護一眾素不齒之程庭桂乎○丙戌諭軍機大臣等前因有人奏

幅匪腐集蒙山諭令崇恩會同德楞額等一體兜拏尙未據該撫將勒辦情形覆奏本日據都察院奏籍隸山東沂州府戶部員外郎劉秉銓等各員呈稱沂郡爲幅匪出沒之所數年來劫案不計其數上年六月間匪首賈九等曾竄至蘭山地方焚掠一空縣丞被戕該縣知縣被縛去贖回白是賊膽愈大本年五月間匪首翟三禿子等又在蘭郊各境搶掠殘害馬頭鎮等處被禍尤烈見在占踞蒙山勢甚鴟張郊城縣知縣胡姓請兵援應該撫等以該匪未據城池並不發兵速剿以致該匪如入無人之境等語山東爲京師門戶沂郡爲南北咽喉似此任意遷延實屬養癰貽患德楞額帶兵見駐嶧縣勒辦東省匪徒是其專責崇恩見派兵勇不敷勒辦著迅卽添調會同德楞額所帶馬隊將此股幅匪趕緊剿除淨盡毋畱餘孽儻再因循不辦任令該匪四出焚掠蔓延各處恐

該撫等不能當此重咎也懍之原摺著鈔給閱看將此由五百里各諭令知之○丁亥廣東巡撫勞崇光奏報廣東軍務夷務情形得旨覽汝所奏抵省視事並能片言折服該夷足見堅持定見毫無畏難之意朕懷甚爲欣慰○以前任浙江巡撫晏端書爲大理寺卿○予廣西陣亡鹽大使曹樹業等祭葬世職○戊子諭軍機大臣等前據俄國使臣伊格那提業幅照覆肅順等稱本國之船斷不借用英國旗號其不通商之處前已行知本國不令船隻前往但京城至東海甚遠此時恐未周知見復備文求轉送北塘俟本國船隻到時交付並將各國旗式繪圖封送等語俄夷旣稱斷不捏稱英國之人並飭令該國船隻勿到不通商之處所繪旗式著卽交僧格林沁查驗並知照盛京山海關兩處一體知悉惟夷船往來海口如果並不滋事卽係英佛之船亦毋庸開礮轟擊儻

敢先行開礮或登陸滋擾則無論何國旗號皆當嚴拒著一併知照玉明定福格綢額遵照爲要華若翰計已行抵北塘茲將答覆該國璽書山驛遞至北塘交恆福面交該使臣祇領如華若翰換約後業已回帆南駛卽著恆福由驛遞交何桂清轉交將此諭知僧格林沁恆福並傳諭文煜知之○己丑諭內閣樂斌奏番匪肆擾派兵剿捕獲勝地方見已安謐一摺甘肅嘉峪關外鶯鶯山等處有番匪突出搶掠經官兵擊退後總兵郭相忠探聞霧拉窯洞地方尙有大股盤踞隨督率兵勇馳往該處掩捕匪已遁去五月十三日追至蒿尾溝直前剿擊斃匪極眾餘悉竄入寫溝藏匿郭相忠於二十日追至該處派令馬步兵丁獵戶入山搜剿殲擒殆盡見在沿邊各隘口已無匪蹤辦理尙爲得手所有在事員弁著樂斌擇其尤爲出力者酌保數員毋許冒濫傷亡兵勇並著查明

請卹○駱秉章奏石逆大股自祁陽敗竄寶慶府南路會集賴積

新等各逆首併力攻撲寶慶

臣

調水陸各軍杜其紛竄飭各將領

由西路東路東北路且堵且剿五月初三日逆賊數萬由長沖口
高橋一帶分十餘路來撲趙煥聯周寬世各以五成隊出擊亦分
十餘路應之鏖戰逾時洪定陞派所部長勝軍分路策應賊不敢
逼洪定陞率親軍七十人挺矛縱馬直陷賊陣忽山凹伏賊突出
洪定陞中礮殞命趙煥聯等憑壘排開槍礮斃賊三百餘名賊始
卻退初六日賊數萬由西南兩路直撲城壘都司滕國獻等擊敗
之乘勢破其三壘田興恕見賊援厚集急派全祖凱等率虎威軍
兩營截之復派遊擊劉義方等繼進各營共斃賊七八百名方官
軍與賊接仗時另股賊在陣後各嶺築壘十餘處近偃田興恕營
盤相距僅三四里是時石逆踞城南十里之澄水橋賴逆踞城西

五里之神灘渡傳逆踞城東十二里之泥灣賊眾號稱數十萬環城三面徧紮營壘惟北路及東北路賊蹤尙稀官軍文報餉需每取道於此臣慮其長圍速合令候補按察使劉長佑等各率所部分路進剿期大舉十七日賊七八萬從馬鞍山柰湖山至東路五里牌壓壘而陳周寬世趙煥聯各出六成隊分路擊之田興恕見東路賊勢甚厚立派四營前往助戰賊布陣縱橫各十數里各路官軍奮力衝殺鏖戰三時斃賊千餘賊始敗退然自是東北路亦皆徧紮賊壘長圍已合文報餉道均梗二十五六等日劉嶽昭等各帶所部兵勇至寶郡東四十里之洪橋副將何紹彩遊擊黃三清亦至劉長佑江忠義劉坤一方由武岡拔營來援師次黃橋石逆偵知遣逆首陳亨容蕭受璜等率賊黨一萬數千復竄新甯蓋知劉長佑一軍將士皆新甯人欲以此爲牽綴也劉長佑以大

義諭所部率之援寶令劉坤一率勇二千回援新甯且斷其竄武岡之路六月初二日劉嶽昭等九營由洪橋進郡東北二十里之柳家橋何紹彩黃三清兩營勇丁二千一百名仍駐洪橋賊見該處軍單遽起乘之是日午後賊二萬餘分十餘路撲洪橋營盤何紹彩黃三清率全隊禦之鏖戰兩時已將賊擊退忽賊數千自後路山梁壓下守營長夫驚潰營壘遂陷何紹彩黃三清督勇血戰突圍而出劉長佑方繞道新化南境之麻溪渡資江而來聞洪橋有失恐柳橋軍心不固遂兼程疾進初五日所部齊抵郡北三十里之嚴塘次日赴柳橋營次會商改由東北一路進剿是時督臣遣李續宜所部湘勇十一營亦陸續渡湖而南將於益陽取齊援寶臣與李續宜商定由益陽取道安化之藍田直指寶郡北路以進並以前調來湘之馬隊官兵一百九十四員名隸之凡寶城內

外各營兵勇三萬有奇均飭歸李續宜節制調遣初十日賊二三萬冒雨撲柳橋營壘劉嶽昭等各營擊卻之斃賊千餘名劉長佑師進高沖石逆見援軍日進抽撥悍賊築壘東北路石山亭一帶阻之賴逆派悍賊數千由神灘渡竄西北紛擾新化南境之草鞵鋪牛山擬復躡援軍之後李續宜全軍於十九日行抵藍田距新化縣城一百一十里距寶慶府城一百四十里其勢又出草鞵鋪牛山之後奸謀遂沮二十日柳橋各軍復進紮半邊街二十五日李續宜師進水竹地方單騎赴高家沖大營晤劉長佑會商破賊之策是夜五鼓賊數萬分伏半邊街近處山嶺二十六日石逆親督大股分由藍江鋪短陂橋清水塘長茅沖蠡擁而來各營出六成隊迎擊奮威衝殺賊始敗潰忽另股賊從各路衝出各營刀矛格擊復斃悍賊數百名又有另股賊隊來撲高沖營盤劉長佑督

率道員江忠義等分路擊之千總劉九盛把總蔣得祿陣亡唐顯烈受矛傷十一處猶裹創力戰斃賊約二三百名二十八日李續宜率全軍渡資而西時東北路大股逆賊均尙未覺辰刻各逆首方率賊六七萬徑撲半邊街大營自雀塘列隊至清水塘環繞二十餘里劉嶽昭等分路截擊自辰至申斃賊二千餘名李續宜一面督率兵勇將田家渡賊壘賊卡一律平毀敗賊爭由浮橋渡資官軍蹙之浮橋中斷溺賊無數是戰共破賊壘七座賊卡三十六處斃賊二千一百餘人生擒二百六十餘人救出難民七八百名而城中文報餉道通矣二十九日賊復大至重重圍裹大股悍賊忽前忽後希圖繞出後路以襲官軍營壘也李續宜不爲之動督飭馬步隊官兵嚴陣以待日午各賊齊偪營壘李續宜號旗一舉正伏齊出前後衝殺賊匪紛潰官軍四面進偪賊屍徧野餘賊渡

資東竄水陸各軍追擊皆有斬擒是日李續宜一軍共踏賊營六十五座賊卡一百三十餘處殺賊八千餘人溺斃者約四五百人。生擒賊一千七百餘人。內有偽軍略戴振聲等賊目四十八名。訊明正法。救出被擄難民五六千人次。日將資西一帶餘匪搜捕淨盡。見在寶郡北路西路已就肅清。大股逆賊均屯聚東南兩路。臣已飭李續宜嚴防東路矣。此次石逆圍攻寶郡。糾合數省劇寇。挾全力而來。勢甚猖獗。儻寶郡稍有疏失。不獨湘省糜爛。卽鄂蜀斷難遏此兇鋒。督臣洞悉賊情。先後調派官軍回湘防剿。並協濟軍餉。俾機勢得以速振。裨益大局。實非淺鮮。按察使銜湖北荆宜施道李續宜居心忠實。識略素優。此次赴援寶郡。機宜敏速。立解重圍。勞績卓著。可否仰懇天恩。賞加布政使銜。以示獎勵。所部將士同心効力。克奏奇功。可否由臣保奏其守城文武官紳及援寶

各軍之實在出力者可否彙案請獎之處伏候 聖裁 上諭石
逆大股攻撲寶慶經水陸各軍援剿屢獲勝仗城圍立解北路西
路已就肅清勦辦甚爲得手按察使銜湖北荆宜施道李續宜赴
援神速懋著勞績著加恩賞加布政使銜以示優獎其餘守城文
武官紳及赴援各軍將士之尤爲出力者著駱秉章彙案保奏○
辛卯閩浙總督慶端等奏閩省庫款空虛見籌辦京餉五萬兩餘
俟隨時設措得旨戶部卽速查明提解省分有無咨報起解在途
若皆似此聊爲點綴各省大吏何膜視如斯該大員等諒不敢盡
昧天良置京都於不顧無論有無報解卽行覆奏俟降旨嚴催○
壬辰諭內閣張芾奏請將退避潰逃之帶兵各弁分別懲辦等語
徽州石埭七都營盤被賊圍困都司劉朝林派守甲子嶺隘輒敢
棄隘不守以致被賊鈔截營盤失陷劉朝林著卽革職嚴行審究

都司銜儘先守備張得福等自南陵調赴石埭沿途逗留縱勇滋事見在尙未到防張得福著先行革職交張芾嚴緝並在逃之藍翎儘先外委張明福滿長勝藍翎軍功張光全譚順發一併緝獲從嚴懲辦千總夏洪才臨敵潰逃著卽革職拏獲後卽行正法副將王恩榮鈴束不力咎亦難辭著拔去花翎以示懲儆其聞警輒退之遊擊田宗興及貽誤事機各員弁均著張芾查明從嚴參辦毋稍寬縱○諭本日據何桂清奏上海民夷互鬪已派道員馳往查辦一摺並將夷人照會及信稿各件鈔錄呈覽呂宋夷人用佛蘭西船隻擄捉內地民人出洋種地非止一次致令民情洶洶激成忿怒見夷人則羣相毆打並誤傷英吉利暹羅兩國之人李秦國等均被誤傷因此各懷疑懼業經何桂清等派委喬松年馳往上海會同吳煦妥辦著卽飭令一面訪拏拐騙之匪徒就地正法

並一面查明下手誤傷夷人之人照例治以應得之罪以期情法兩平無枉無縱至暹羅係臣服之國其朝貢使臣及遭風難夷中國待之均有恩禮此次該國民人誤被淹斃著該督飭令地方官嚴緝兇犯務獲究辦俟辦理完竣具奏後尙須給予敕書以示撫恤遠人之意至英酋所請欲桂良等給普魯斯照會以爲和解但桂良等在上海邀普魯斯會面竟不肯前往今桂良等回京已繳欽差關防無從與聞其事前已將見擬辦法於七月初三初七等日寄諭何桂清業已接奉自當遵照籌辦如有轉圜之處卽可在上海辦理至上年條約內萬不可行之事正可藉此挽回何桂清當堅持定見迎機善導米夷華若翰已於十八日在北塘與恆福換約卽於二十日起碇回南應覆璽書已由恆福驛遞交何桂清轉付矣將此由六百里諭令知之○諭張芾奏賊匪旁竄太平縣

之宏潭郭村地方徽防緊要並建德勦匪情形各摺片宏潭郭村
地方爲太平黟縣門戶賊匪分股竄擾徽防喫緊雖有江長貴等
分扼嶺隘恐賊眾兵單不敷防勦建德與江西接壤見在景德鎮
業經收復普永堯一軍株守九江置重兵於無用之地著耆齡嚴
飭該總兵剋日帶兵出境會合建德各軍實力兜勦以遏賊氛儻
或藉詞遷延卽著嚴行參奏昨據李定太奏撥兵勇一千名赴祁
婺一帶援勦得此兵力聲勢較壯張芾已飭王夢齡楊名聲等進
嶺聽調著妥籌布置嚴密防範勿令匪蹤闖入爲要其參將馬懷
珍等各隊卽令畱守祁門嶺隘以備建德踞匪蠢動俟徽郡防務
稍鬆再飭該弁等出嶺會勦以掃逆氛將此由六百里各諭令知
之○予安徽陣亡副將吳偉奇等祭葬世職○癸巳諭內閣前給
事中李培祐奏山東曹州鎮總兵多隆武於上年捻匪竄擾城武

曹軍等縣時聞警逃回致縣城相繼失守本年四月捻匪由徐州北竄護兗州鎮總兵忠順未卽接仗隨卽回兗等情當降旨交副都統德楞額詳查具奏茲據奏稱訪查並探聞確情均與該給事中所奏大略相符多隆武以帶兵大員駐紮青沽集與城武等縣相距非遙賊攻單縣並連陷城武曹縣該總兵並不隨時勦擊至定陶不敢前進本年賊由徐州北竄圍攻嶧縣該縣知縣鄒宗孟帶領兵勇追勦力解城圍護總兵忠順停畱鄒縣藉詞遲延數日之久始能到嶧旋卽回兗並未追賊實屬庸懦無能貽誤地方調任河南南陽鎮總兵多隆武前護理兗州鎮總兵參將忠順均著摘去頂帶革職畱任以示懲儆山東巡撫崇恩有督率之責並不據實參奏著交部議處○予雲南陣亡府經歷董家蘭等祭葬世職○甲午諭軍機大臣等據翁同書奏陳練兵選將裕餉事宜一

摺覽所奏各條並無非常奇策所請調固原漢中等處官兵因陝甘兵已無可再調業經兩次寄諭令與勝保會合兵力便不爲單今據稱勝保所派之兵屯駐明光未能進與會合然翁同書麾下尙不乏敢戰之將身任幫辦而不能調度雖增兵添將亦何足恃至鄭魁士一員該撫屢請調往安徽因其交卸甯防後傷病增劇未令前往嗣據和春奏以高淳東壩軍情喫緊並該處民情均願鄭魁士畱防是以准行至翁同書所舉胡林翼袁甲三等一係湖北軍務不可少之人一係初到清淮當此蔣壩喫重之時正賴籌畫禦侮各有專司皆爲重任何能舍他處軍務專顧安徽耶至所請山東山西陝西每月協銀二萬兩悉解該撫軍營河南月餉該撫酌分三萬兩而以江蘇月餉等款悉歸勝保軍營均可依議辦理著卽由該撫與勝保分晰清楚咨明各省照數劃解以免歧誤

另片奏稱已咨商勝保將所畱馬隊照舊駐紮毋庸撤回蔣壩等語亦著照所議辦理將此由六百里各諭令知之○幫辦軍務安徽巡撫翁同書奏陳練兵選將裕餉事宜得旨不過一瀆請之奏並無非常奇策汝動云勝保是己非人汝之膠柱而鼓必遂其謀非以己爲是而何○乙未 上還宮○予安徽陣亡道員郭需霖等祭葬世職○丙申諭內閣前因京師米糧騰貴兵食維艱曾降旨將八旗及巡捕各營兵餉每月搭放實銀三成以紓兵困惟念數月以來食用價值仍屬有增無減兵丁生計尙形竭蹶著自本年八月爲始所有八旗及巡捕各營兵丁月餉應放票鈔折銀三十五萬一千兩零內著加恩再加放實銀二成共搭放實銀五成著戶部卽隨時籌款給發其旗營每月應放二成鐵制錢文著每串以二成鐵制錢八成銅當十錢配搭放給以示體恤○諭惠親

王等奏設法採買銅斤並申明舊章嚴禁銅器一摺京局需銅鼓鑄節經戶部奏准將銅器分別斤數禁止打造使用並經刑部等衙門議奏在案乃地方官因循日久漸至視爲故常以致銅斤日形短絀採買商銅赴局交納者亦屬寥寥亟應申明舊章認真辦理所有各項銅器除樂器及古銅彝鼎等物不計外其餘各樣銅器凡在一斤以上者概行禁止在京大小官員民人等自奉旨之日起限三月將一斤以上銅器赴部呈交如有逾限不交出將銅斤入官仍照刑部等衙門奏定官民處分罪名成案分別辦理其各省銅鋪私造一斤以上銅器者照例治以應得之罪京外各商呈交各色銅斤以及民戶呈交銅器者均隨時赴戶部官局查驗呈色兌收概以實銀給價自此次申明降旨後該部及地方官務須出示曉諭實力奉行以裕銅斤而濟鼓鑄○諭惠親王等奏請

飭催各省欠解京餉銀兩開單呈覽等語山東等省節年欠解京餉銀兩爲數甚多經戶部於本年兩次定限奏催迄今延不報解清款實屬玩誤所有山東河南陝西浙江等省歷任督撫藩運各司均著交吏部查取職名分別議處仍將各該省欠解咸豐六七八等年銀三百六十六萬餘兩勒限三箇月埽數解部交納以清款項其本年山西山東河南陝西浙江四川等省欠解銀二百八十二萬餘兩並著各該督撫等迅速籌畫務於年底報解全完儻因循玩延解不足數卽著戶部奏參將該督撫等及藩運各司從重懲處該部卽遵諭行○諭前因提督鄧紹良在潯址地方殉難當經降旨查明該員子嗣俟服闋後帶領引見茲據和春奏該故員之子光祿寺署正銜鄧亨先尋覓父骸竟不可得情殊可憫鄧亨先著先行賞給員外郎銜以示朕軫念盡臣至意○諭軍機大

臣等前因勝保馳援定遠諭令和春調度蔣壩天長防剿事宜茲據奏稱金陵距蔣壩地勢太遠難以兼顧請就近交袁甲三調度等語蔣壩爲清淮門戶地方緊要前已諭令袁甲三督率剿辦所有和春派撥安勇一軍及勝保畱防蔣壩盱眙之兵均著歸袁甲三節制該署漕督卽妥爲布置相機堵剿和春雖駐紮金陵而江北各軍剿辦機宜亦當統籌兼顧據勝保奏攻剿六合及畱防揚州邵伯之兵共一萬八千餘名兵力不爲不厚天長之賊經勝保決河灌城已衝塌十餘丈該逆見已出城散處著和春仍遵前旨迅飭駐揚官軍先打天長不必遙待浦六相連毋得再事延緩將此由六百里各諭令知之○諭昨據翁同書奏稱與勝保軍營劃分餉銀並請畱馬隊等語當經諭知勝保翁同書均照所議辦理矣茲據勝保奏移營五河圖攻懷遠請飭翁同書撥回馬隊並籌

分軍餉各情該大臣於明光獲勝後卽親往五河部署爲疾擣懷城之計自應審度機宜迅圖克復惟據稱僅帶步隊三千馬隊弁兵百名其分撥滁州明光各路馬隊六百餘名一時概難抽撤所有節次派往翁同書軍營之馬隊官兵擬請酌撥回營但兩路軍情並形喫重仍不得全數調回致翁同書攻剿不能得力著於馬隊內分別畱用若干總期彼此兼顧毋許掣肘馬隊數目與昨日翁同書所奏因何不符著卽覆奏至該撫奏請以山西山東陝西月餉解歸該撫軍營河南月餉酌分三萬兩以江蘇等款悉歸勝保而該大臣則請山西陝西之餉由潁壽徑解翁同書軍營山東江蘇之餉由清江徑解勝保軍營其河南月解餉銀餉票由該省起解時劃撥分投交收於解到時勻撥分濟亦屬可行惟當覈算何款有著何款無著兩處分晰均勻不得此贏彼絀稍致偏枯著

翁同書會商覆奏該大臣等惟當和衷共濟勿得再存意見致誤
事機懷之愼之將此由六百里各諭令知之○諭勝保奏皖疆事
機危迫請飭浙江四川迅籌撥解銀兩等語勝保東路一軍見在
添募水師購製船礮並須籌給勇糧需用孔殷自應豫爲籌備以
資接濟著有鳳胡興仁無論何款迅速各籌撥銀五六萬兩遴委
委員解赴勝保軍營以濟要需將此由五百里各諭令知之○幫
辦江南軍務甯古塔副都統富明阿因病開缺回旗命福建陸路
提督李若珠幫辦江南軍務○是月蠲緩江蘇邳州等七州縣衛
山東高唐等四十八州縣衛東平所永阜等三場被災地方並青
城縣歉收莊屯新舊額賦